

■ CONVIVENZA

Co decider?

BETTINA CADOTSCH*

L'onn 2021 è anc giuven. Frestg. Quasi nunschrit. El ans po anc por-scher bler. Bleras bunas chaussas, bleras nauschas, ina massa surpraisas, numerus bels muments, ma era numerus grevs muments. Nus na savain oz betg anc tge che ans spetga. Insatge però è cler: era quest onn vegnin nus tuts puspè a prender ina massa decisiums che determineschon il decurs da nossa vita. Per quest motiv vulesch jau parter oz in pèr patratgs davart il tema decisiums.

Nus umans avain da prender mintga di decisiums. Bleras decisiums banalas sco per exempel tge trair en la damaun per ir a lavurar u tge mangiar da gentar. Ma nus avain era da prender bleras decisiums impurtantas u pli grevas. Nus pudain per exempel decider da metter autras prioritads en connex cun la lavur ed il temp liber. U da realisar in siemi che nus avain gia daditg. Tranteren èsi era da prender decisiums che fan mal il cor. Quai pudess esser da laschar enavos in'amicizia. U da midar la vita cumpletmain sco ir a star insanua auter u midar piazza.

Tuttina tge decisiums ch'èn da prender: uschè differents sco che nus



umans essan, uschè different giain nus enturn cun nossas decisiums. I dat numnadain persunas che san adina tge ch'ellas vulan. Ellas reflecteschon curt e n'han betg fadia da dir A u B. Jau pens che quai èn per uschè dir managers da decisiums. Alura datti umans che han adina grev da prender decisiums, schizunt tar chaussas banalas. Per prender decisiums pli seriusas passentan els dis e notgs cun ponderar tut las consequenzas pussaivlas. La finala datti anc la gruppa che viva tenor il motto «No risk, no fun» u «You only live once». Quels umans sa decidan spert per insatge. Els na reflecteschon betg mintga pass ed acceptan alura era las consequenzas.

Jau pens che nus tuts esan ina giada spontans ed in'otra giada pli precauts. L'ina u l'otra vart en nus è però simplamain bler pli marcanta. Tuttina, sche nus tutgain plitost tar ils indecis u tar quels che deci-

dan spert: nus tuts avain gia fatg bunas e nauschas experientschas. Tranteren va insatge mal che nus avain considerà e reflectà diversas giadas. Tranteren sa mussa ina decisium spontana sco il pli grond jackpot da la vita – u precis il cuntrari.

Cunquai che l'onn 2021 è anc giuven e nus avain anc da prender bleras decisiums, vulesch jau As encuraschar da decider forsa er ina giada u l'otra in pau auter che usità. Forsa che quai ans maina numnadain en tut auters lieus, tar auters umans ed ad autras experientschas. Jau fatsch en mintga cas il propièst da viver anc in zichel dapli tenor il motto «No risk, no fun». E tge che jau chat er impurtant è da daventar conscient che decisiums na ston betg adina esser perfetgas per ch'ellas vegnian la finala bunas. Tgi che tschertga numnadain la decisium perfetga, na la chatta forsa mai.

*Bettina Cadotsch è creschida si a Savognin. Ella ha studegià Multimedia Production a la Scola auta spezialisada dal Grischun a Cuira e lavurussa tar Radio Südostschweiz, «suedostschweiz.ch» e la «Südostschweiz».

La convivenza da linguas e culturas en il Grischun. Quai è il tema da la convivenza che cumpara mintgamai glindesdi en La Quotidiana ed en la Südostschweiz.